

**Date – 21/10/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Home Minister Pu K. Sapdanga chuan kum thar February thla a village council inthlang hman turin inbuatsaihna kalpui mek a ni a ti.**
- 2. Tuialhthei man tihniam tura sorkar an ngenna a hlawhchham tak avangin Mizoram Commercial Vehicle Union chuan tunkar Nilaini atangin tiam chin awm lova an lirthei dintir an tum.**
- 3. Prime Minister Narendra Modian nimin khan a bial chhung Varanasi atangin hmasawna hna hrang hrang cheng vaibelchhe 6700 hu lungphum a phum.**
- 4. Jammu and Kahsmir-a firfiakten inhlawhfa mi paruk an that a, mi pali dangin hliam an tuar a, he thilthleng hi a dem thu Union Home Minister Amit Shah chuan a sawi..**

**<><><>**

**VC POLLS**

**Home Minister Pu K. Sapdanga chuan kum thar February thla a village council inthlang hman turin inbuatsaihna kalpui mek a ni a ti.**

**Inrinni a Kawnpui Police station leh Mualvum a First IR battalion hmunpui, Kawnpui leh Hortoki khuate a tlawhna-ah Pu K. Sapdanga chuan, an party in sorkarna chang mahse Village Council tam zawkah party dang VC an la tam zawk avangin hmasawna hnathawh a harsa tih a sawi a. He mi vang hian sorkar chuan hmasawna thawh a nih thuai theih na'n a rang thei ang bera VC inthlan buatsaih a tum a, February thla-a inthlanna hi neih hman turin inbuatsaihna kalpui mek a ni, a ti.**

**Home Minister chuan, Police lak thar turah online hmanga dilna thehluk theih turin buaipui mek a ni, a ti bawk a. Police indaihlohna puhru turin sorkar-ah Police hna ruak 1,100 hnawhkhah dilna thehluk a ni a, chutihlai chuan, sorkar sum dinhmun a that loh avangin police 290 lak phaksak a ni a; kar leh maiah Police lakna tur Advertisement hi tihchhuah tum niin, Online hmang pawha dilna thehluk theih turin buaipui mek a ni a ti. Mipuiin Police te lakah beiseina an nei sang a, rim taka hnathawh a ngaih bakah mipui nena thawhhona tha neih a pawimawh a ni, a ti.**

**<><><>**

**TRANSPORTER STIR**

**Tuialhthei man tihniam tura sorkar an ngenna a hlawhchham tak avangin Mizoram Commercial Vehicle Union chuan tunkar Nilaini atangin tiam chin awm lova an lirthei dintir an tum.**

Mizoram Commercial Vehicle Union (MCVU) thuchhuah chuan Nilaini zing dar 6 atangin sumdawna atana lirthei zawng zawng tiam chin awm lova din ni se tih an rel a. Mizoram pumah kawng a chhiat em avangin maxicab te pawh khaw tam takah an tlan thei lo mek niin an sawi a. Ei leh bar nitin mamawh phurtu truck te pawh kawng lai-ah tlu-in a chhe nasa em em niin an sawi. PWD enkawl kawng chan bikte chu sorkarin a siamthat thuai an phut tih an sawi a. Company hrang hrangin an enkawl lai kawngte pawh siamtha thuai tura an ngenna chuan awmzia a nei tawh lo bawh ni a sawiin tuialhthei man pung zel nen an lirthei tlantir lo a dintir an titlu ta niin an sawi a ni.

Hetianga lirthei tlan loh an tih chhan hi sawifiahin chief minister-in a thuphunga NGO Coordination Committee leh MCVU te tuialhthei man tih hniam a tiam tawh Council of Ministers thukhawmin tihnam lova a ngai a kal tlang an rel leh tak si vang niin an sawi. An thuchhuahin a sawi danin MCVU hian petrol leh diesel hi cheng 5 ve ve a tihhniam an phut a, NGOCC chuan cheng 3 ve ve a tihlawm an phut thung a. He mi chungchangah hian pawl pahnihte inbiakna-ah NGOCC chuan chief minister-in September ni 1-a tuialhthei man tihtona thupek hi sut a nih tur thu a sawi chu sawi chhawngin chief minister-in NGOCC te hnena a thutiam chu pawm ve turin an ngen a. Chuvang chuan nawrh an lo tum pawh chu an sut niin an sawi a.

NGOCC leh MCVU-te October ni 10-a an inbiakna-ah hian NGOCC chairman chuan October ni 8-a chief minister an biaknaah petrol leh diesel litre khan man cheng 3 ve ve a tihhniamna thupek siam leh tur chuan a man tihpunna kha cabinet thurel a nih avangin cabinet bawkin a ngaihtuah leh a thutlukna siam a ngai a. Cabinet thutkhawm koh thuai a nih tur thu leh chumi chhung chuan tuialhthei man tihtona thupek chhuah tawh chu hman rih loh (kept in abeyance) a dah a nih tur thu chief minister-in a hrilh ni a an sawi chu pawm ve mai turin NGOCC hian an ngen ni-in MCVU chuan an sawi.

October ni 11-ah MCVU hruaitute hian chief minister hi an hmu bawh a. Hetah pawh hian CM chuan tuialhthei man tihtona thupek sut lehna (revoke order) a tihchhuah tawh thu a lo hrilh niin an sawi a. October ni 16-ah cabinet thutkhawm koh a nih thu bakah tuialhthei man tihhniam a beisei thu lo hrilhin chuvang chuan lungawi lohna an lantir tum chu thulh rih turin CM hian a lo ngen niin an sawi a. Cabinet inkhawm a awm thuai dawn avangin chumi tal chu lo nghak tura a ngenna chu zahin October ni 14 atanga lungawi lohna lantir an lo tum tawh chu an thulh ta niin an sawi a ni.

Hetih lai hian Council of Ministers thukhawmin petrol leh diesel man tihnam lova a ngai anga kal leh tura thutlukna a siam leh tak si avangin Inrinni a Mizoram Truck Owner Association pisa a MCVU thukhawm chuan Nilaini atanga sumdawng lirthei zawng zawng dintir vek chu an rel thlu leh ta niin an sawi.

(Desk)

<><><>

DFO

Lunglei Forest Division DFO Pu Lalduhthlana chuan ramhnuai atanga khuaino lak, zawrh leh hralh a khap

DFO hian thuchhuah siamin ramhnuai atanga lak khuai leh khawizu chu 'The Mizoram Forests Act, 1955 hnuai 'forest produce' zinga chhiar tel a nih thu leh khuai lak thin dan enin a rem mai ang tih a hlauhawm a, lo leh huan neitute thlai chin a lo puitlin a, hlawk zawka thar a nih theih na'n leh ramngaw a lo hrisel zawk theih na'n Lunglei Forest Division huamchhungah ramhnuai atanga khuaino lak, zawrh leh hralh khap a nih thu a chhuah a ni. Tunlaiin ramhnuai atanga Khuaino la leh zuar an awm thin tih hriat a ni a, kuaite hi thlai chin leh ramhnuai a thing leh ramhmul chi hrang hrang inthlahpun na'na nungcha pawimawh tak an ni a. Chubakah thlai chin leh ramngaw ei chhetu nungcha dang eitu an ni bawk a, khuai hi food chain-a nungcha pawimawh tak an nih thu a sawi a ni.

<><><>

AMUR FALCON

Centre for Environment & Social Justice (CESJ) chuan lam hla taka rawn kal thin Sialsir sava Mizorama an chawlh chhunga humhalh a nih theih na'n district bawrhsap, VC leh central YMA te thawhpui-ah an sawm.

CEJS chuan district zawng zawnga bawrhsapte hnenah an district huam chhunga Sialsir leh nungcha dangte thahna, silai, sarawkherh, air gun leh thangte khap turin an ngen a. Mizorama an cham chhunga hlau lo leh thlabar lo a hahdam taka an chawlh theih na'na; lo humhim leh chawlhna tlaka lo enkawl turin Mizoram Village Council president hnenah Mizoram puma VC zawng zawngte hnena hrilh turin kan ngen bawk a, Central YMA hruaitute pawh Mizoram puma an branch-te hrilh turin an ngen bawk a ni. Mizoram mipui zawng zawng hnenah he'ng mikhual, thla hnih emaw chauh cham turte hi dimdawi vek turin an ngen nghal a ni.

Mizoram hi a hausa a, sava chi hrang 670 vel awm anga ngaih a ni a. Chung zingah chuan thlasik laia lo pem thinte, nipui laia lo cheng thin mai bakah an pemna kalkawnga Mizoram rawn paltlang thin eng emaw zat awmin, a tam zawkte hi cheng nghet an nih thu CEJS thuchhuah chuan a tarlang.

Sialsir (Amur Falcon\_ Falco amurensis) te hi sahel ei chi savate zingah chuan hriat theih china pem thui ber an ni a. Mongolia, China leh Russia ram atangin thlasik khawvawt tlansanin Africa khawmualpui chhim lamah daih an pem thin. Mongolia, China leh Russia ramah te hian no neiin an awm a, thlasik a lo thlen dawnah Africa chhimlam panin an zin kawng an zawh tan thin a. An zinna kawngah hian hmarchhak state thenkhatah chawl khaw muangin Khuangchawi thla laihawlah hi chuan Mizoram pawh an lo thleng tawh thin a. Pawtlak thlaah hian Mizoram an chhuahsan fel thawkhat tawh thin ni a hriat a ni.

<><><>

ASF

African Swine Fever (ASF) vawk pulhri leng mek chuan zia-awm lam a pan chho zel a, ni khata vawk thi pawh a tlem chho zel a, nimin khan Lunglei leh Hnahthial district-ah vawk thi 7 chauh report a awm.

Inrinni khan Serchhip district a Baktawng khua-ah vawk 3 a thi a, district dangah vawk thi report a awm lo. Vawiin thleng hian kumin chhunga ASF vawk pulhri avanga vawk thi zat chu 14,071 a tling tawh a, tuna vawk pulhri puan mekna khua a puan hi khaw 250 niin Vety department hotute chuan an sawi. Vawk pulhri darh zel tur venna atan nimin khan Lunglei district-ah vawk 4 suat a ni a, Haulawng, Theirial leh Vanhne khua-ah te suat a ni. Kumina vawk pulhri avanga vawk suat zat chu 23,479 a tling tawh a ni.

<><><>

PM

Prime Minister Narendra Modia chuan nimin khan a bial chhung Varanasi atangin hmasawna hna hrang hrang cheng vaibelchhe 6700 hu lungphum phumna leh hawna hun a hman. Heng hnathawh tur zingah hian airport pathum Madhya Pradesh-a Rewa, Chhatisgarh-a Ambikapur leh Uttar Pradesh-a Saharanpur amite an ni a. Heng thlawhna tumhmunte hi Regional Connectivity Scheme UDAN (Ude Desh Ka Aam Nagrik) hnuai sak tur an ni.

Thusawiin Pu Modia chuan hmasawna hna hrang hrang zirna, thiamthil hmasawna, infiamna, hriselna leh khualzin hipna lama kalpui thinte chuan mipuite khawsak phung a tihhmasawn bakah thalaite hna nei lo tan hna thar tam tak a pe a ti a. Sawrkar laipui chuan kum 10 kalta chhungin hmasawna ruhrel tihchanglung turin theihtawpin beihpui a thlak a ti a. Heng hmalaknate hi mipui khawsak nawmna leh thalai hna neihna tura tih vek a ni a ti bawk.

<><><>

J&K

Jammu and Kahsmir-a firfiakten inhlawhfa mi paruk an that leh mi pali dangin hliam an tuar chu a dem thu Union Home Minister Amit Shah chuan a sawi. Hliam tuarte hi sub-district hospital Kangan ah lak an ni a, hemi hnu hian Srinagar khawpuia SKIMS hospital ah sawn an ni.

Thudawn danin Gagangier atanga Sonamag tourist resort inkar leiverh hna thawktu inhlawhfate chu nizan khan firfiakte hian an that a. Union Home Minister Amit Shah-a chuan pawikhawihute chu chhuah an nih loh tur thu leh na taka chhan let an nih tur thu a sawi a. Mitthi chhungte a tawrhpui thu sawiin hliam tuarte pawh dam leh thuai turin duhsakna a hlan a ni.

Union Road Transport and Highways Minister Nitin Gadkari pawhin firfiakte chetna chu a dem thu a sawi a ni.

<><><>

ISRAEL

Gaza chhim lamah Israel sipaiten mi 87 an that a, mi 40 chaungin hliam an tuar. Thudawn danin Israel sipaite hian Gaza chhim lama Beit Lahia chu nimin khan nasa takin an kap a, Hamas hotute chuan mitthi zat hi an la pun an rin thu an sawi a.

**Hetihlai hian Lebanon-ah pawh Israel chuan Hezbollah pawlte an kap  
chhonzawm zel a. Beirut khawpui chhim lama an inkulhna nia hriat an bei mek  
a ni.**

<><><>